

08 JUN 2003

Mohar-Meninggal (Bergambar)

RAJA MOHAR MENINGGAL DUNIA

KUALA LUMPUR, 8 Jun (Bernama) -- Pakar ekonomi dan pengerusi Perusahaan Otomobil Kedua (Perodua) Raja Tun Mohar Raja Badiozaman meninggal dunia di Pusat Perubatan Pantai di sini pagi ini.

Allahyarham berusia 81 tahun.

Isteri Allahyarham, Toh Puan Norella Talib, 67, serta tiga anaknya Raja Noor Dunita, 45, Raja Mazhar, 40 dan Raja Noor Mazli, 37, berada di sisi Allahyarham ketika Allahyarham menghembuskan nafas terakhir pada pukul 3.19 pagi.

Anak sulung Allahyarham, Raja Noor Dina, meninggal dunia dua tahun lepas.

Menurut Raja Mazhar, Allahyarham, yang sering mengadu sesak nafas, dimasukkan ke pusat perubatan itu dua minggu lepas.

Allahyarham baru kembali dari mendapat rawatan di London sebulan lepas.

"Jumaat lalu beliau kelihatan beransur pulih, boleh makan dan bergurau dengan anak cucu yang melawatnya," katanya kepada pemberita di kediaman Raja Mohar di Jalan Damai, Ampang.

Semalam, bagaimanapun Allahyarham mengalami sesak nafas dan demam panas, katanya.

Jenazah Allahyarham akan disemadikan di Tanah Perkuburan Islam Ampang pukul 5 petang ini.

Allahyarham, yang dilahirkan di Kuala Kangsar, Perak pada tahun 1922, mendapat pendidikan di Sekolah Menengah Clifford sebelum melanjutkan pelajaran ke Raffles College, Singapura.

Allahyarham memperolehi ijazah sarjana muda ekonomi dari Universiti Cambridge di England pada tahun 1952 dan setahun kemudian lulus dengan diploma ekonomi pertanian.

Sebagai pakar ekonomi, kerjaya cemerlang Allahyarham meliputi perkhidmatan dalam sektor awam dan kemudiannya di swasta.

Raja Mohar pernah menjadi penasihat ekonomi kepada tiga Perdana Menteri termasuk Datuk Seri Dr Mahathir Mohamad.

Antara jawatan penting lain yang pernah disandangnya ialah Ketua Setiausaha Perbendaharaan dan pengerusi beberapa organisasi seperti Penerbangan Malaysia (MAS), Petronas dan Bank Islam Malaysia Berhad.

Raja Mohar, yang dianugerahi Tokoh Maal Hijrah pada tahun 1993, juga pernah menjadi pro-canselor Universiti Sains Malaysia.

-- BERNAMA

KK AZZ ROS